

Jafnréttisstefna Grænuvalla 2019-2022

Jafnréttisstefna leikskólans Grænuvalla á við nemendur, foreldra, kennara og aðra starfsmenn leikskólans. Hún byggir á lögum um leikskóla, Aðalnámskrá leikskóla 2011, lögum nr. 10/2008, um jafna stöðu og jafnan rétt kynjana,. Einnig tekur stefnan til annarra skilgreindra hópa sbr jafnræðisreglu stjórnarskrárinnar 65. gr. laga nr. 33/1944:

„Allir skulu vera jafnir fyrir lögum og njóta mannréttinda án tillits til kynferðis, trúarbragða, skoðana, þjóðernisuppruna, kynþáttar, litarháttar, efnahags, ætternis og stöðu að öðru leyti. Konur og karlar skulu njóta jafns réttar í hvívetna.“

Með lögum um jafna meðferð á vinnumarkaði nr 86/2018 er skýrt kveðið á um bann við allri mismunun fólks á vinnumarkaði, hvort heldur beina eða óbeina, á grundvelli kynþáttar, þjóðernisuppruna, trúar, lífsskoðunar, fötlunar, skertrar starfsgetu, aldurs, kynhneigðar, kynvitundar, kyneinkenna eða kyntjáningar.

Nemendur og foreldrar

Á Grænuvöllum er lögð áhersla á að komið sé fram við alla af virðingu, jákvæðni og opnu hugarfari, sem er forsenda þess að öllum geti liðið vel. Í leikskólanum skipta allir miklu máli og hver og ein manneskja gegnir hlutverki innan skólans. Börn og kennarar ákveða hlutverkin saman að hausti og þeim er svo skipt jafnt á alla nemendur yfir skólaárið.

Í aðalnámskrá leikskóla stendur að markmið jafnréttismenntunar sé að skapa tækifæri fyrir alla til að þroskast á eigin forsendum, rækta hæfileika sína og lifa ábyrgu lífi í frjálsu samfélagi í anda skilnings, friðar, umburðarlindis, víðsýni og jafnréttis. Í leikskólanum leggjum við okkur fram um að tala eins til allra kynja og leggjum áherslu á að öll börn hafi val um það sem þau vilja gera í leik og starfi. Jafnréttisfræðslan á Grænuvöllum er samþætt inn í allt starfið. Við vinnum gegn staðalímyndum og samþykkjum ekki að sum störf séu strakastörf og önnur störf séu stelpustörf. Litir eru ekki kynjaskiptir og föt ekki annaðhvort fyrir stelpur eða stráka. Við erum börnunum fyrirmynd og framkoma okkar endurspeglar hegðun og skoðanir barnanna.

Á Grænuvöllum eiga allir jafnan rétt óháð aldri, búsetu, fötlun, kyni, kynhneigð, litarhætti, lífsskoðun, menningu, stétt, trúarbrögðum, tungumáli, ætterni og þjóðerni. Áhersla er lögð á að öll börn eigi sem víðtækasta og jafnasta möguleika og hvergi í skólastarfinu séu hindranir í vegi hvors kynsins. Allir eru ólíkir og við erum frábær eins og við erum. Við vinnum með jafnrétti m.a. með því að hlusta og viðurkenna hvert annað. Við erum ekki alltaf sammála og það er allt í lagi. Við leggjum áherslu á vináttu og virðingu í samverustundum, á barnafundum, í umræðum, söng og leik.

Á Grænuvöllum er þörfum sérhvers barns mætt, þau fá það viðmót, hvatningu og örvun sem þeim hentar til að geta tekið þátt í öllu starfi leikskólans óháð kyni. Við stuðlum að því viðhorfi að eðlilegt sé að börnin leiki sér með allt leikefni og taki þátt í öllu starfi leikskólans óháð kyni. Við notum frekar orðin börn eða krakkar en strákar og stelpur.

Mæður og feður eru jafngild í foreldrasamstarfinu. Á Grænuvöllum beinum við samskiptum jafnt til beggja foreldra þegar um sameiginlegt forræði er að ræða. Báðir foreldrar eru hvattir til að taka þátt í leikskólastarfinu, mæta í foreldraviðtöl og á fundi. Við leggjum áherslu á að í stjórn foreldrafélags og í foreldraráði starfi bæði mæður og feður.

Kennarar og annað starfsfólk leikskóla

Á Grænuvöllum er þess gætt að allir fái sömu laun og njóti sömu kjara fyrir sömu og jafnverðmæt störf óháð kyni. Þegar laus störf eru auglýst við leikskólann eru öll kyn hvött til að sækja um og ef tvær jafnhæfar umsóknir berast er ráðið af því kyni sem á hallar í leikskólanum. Öllum sem starfa við kennslu í leikskólanum er boðin starfsþjálfun og endurmenntun, óháð kyni. Starfsfólki, sérstaklega verðandi foreldrum eru kynnt réttindi sín og skyldur gagnvart vinnustaðum og áhersla lögð á að feður jafnt sem mæður sinni veikum börnum sínum heima. Reynt er eftir fremsta megni að fara eftir óskum starfsmanna um lækkað starshlutfall og vinnutíma vegna fjölskyldulífs. Starfandi foreldrum er gert kleyft að sinna börnum sínum þegar þess þarf, fara í foreldraviðtöl, á skólaskemmtanir, með börnin til læknir o.s.frv. Starfsfólk í hlutastarfi er hvatt til að sinna einkaerindum utan vinnutíma sé þess kostur. Í skóla og deildarsáttmálum kemur fram að framlag allra skipti máli í leikskólanum og jafnframt sýnum við hvoru öðru skilning. Allir hjálpast að til að hlutirnir geti gengið. Í skólasáttmálum segir einnig að koma skuli fram við annað starfsfólk af virðingu og að einelti, kynbundið og kynferðislegt ofbeldi og áreiti sé ekki liðið í leikskólanum. Við leggjum mikið upp úr góðum starfsanda á Grænuvöllum, hér nýtur allt starfsfólk sömu virðingar og framlag hvers og eins er vel metið.